

প্রভাতী বাংলা সংবাদ, আকাশবাণী আগরতলা- ২৩শে এপ্রিল, ২০১৮

## সড়ক নিরাপত্তা সপ্তাহ :

আজ থেকে ২৯ তম জাতীয় সড়ক নিরাপত্তা সপ্তাহ উদযাপন শুরু হচ্ছে । নিরাপদে পথ চলাচল সম্বন্ধে জনসচেতনতা বৃদ্ধি করাই এই সপ্তাহ পালনের উদ্দেশ্য ।

আজ সকালে আগরতলার বিবেকানন্দ ময়দানে ২৯ তম জাতীয় সড়ক নিরাপত্তা সপ্তাহ-এর উদ্বোধন করা হবে ।

সড়ক নিরাপত্তা সপ্তাহ উদযাপন উপলক্ষ্যে এক বার্তায় রাজ্যপাল তথাগত রায় কর্মসূচির সফলতা কামনা করেছেন ।

মুখ্যমন্ত্রী বিপ্লব কুমার দেব এক বার্তায় বলেছেন, যানবাহন মালিক-চালক, যাত্রী-সাধারণ, পথচারী -সকলের মধ্যে সড়ক নিরাপত্তা বিষয়ে সচেতনতা বৃদ্ধির মাধ্যমে পথ দুর্ঘটনা রোধ করা সম্ভব । মুখ্যমন্ত্রী বলেছেন, পথ দুর্ঘটনা শুধু দুর্ঘটনাগ্রস্ত ব্যক্তিকেই নয়, গোটা পরিবারকেই বিপর্যস্ত করে তোলে । মুখ্যমন্ত্রী নবীন প্রজন্মকে সড়ক নিরাপত্তা নিয়ে আরও ব্যাপকভাবে সচেতন করে তোলার উপর গুরুত্ব আরোপ করেছেন ।

পৃথক এক বার্তায় পরিবহনমন্ত্রী প্রনজিত সিংহরায় বলেছেন, এ বছরের সড়ক নিরাপত্তা সপ্তাহ-এর মূল শ্লোগান হচ্ছে, “সড়ক

সুরক্ষা-জীবন রক্ষা’’ । আমাদের নিজেদের জীবন ও পরিবারের সুরক্ষার স্বার্থেই এই শ্লোগানকে আন্তরিকভাবে প্রতিদিন সজাগ থেকে কার্যকর করতে হবে, বলেছেন তিনি ।

\*\*\*\*\*

### বিশ্ব পুস্তক দিবস :

আজ বিশ্ব পুস্তক দিবস । এই উপলক্ষ্যে অক্ষর পাবলিকেশানের পক্ষ থেকে আজ সন্ধ্যায় আগরতলা প্রেস ক্লাবে এক আলোচনা সভার আয়োজন করা হয়েছে । আজকের সময়ের পরিপ্রেক্ষিতে বই-শীর্ষক আলোচনা সভায় অংশ নেবেন - কলকাতা পাবলিশার্স গিল্ডের সম্পাদক ত্রিদিব কুমার চ্যাটার্জি, বিশিষ্ট চিকিৎসক ও পুস্তক প্রেমী ডা: অচিন্ত্য ভট্টাচার্য্য, অধ্যাপক দেবজিৎ চক্রবর্তী ও অধ্যাপক বিশ্বজিৎ গুপ্ত । বাংলাদেশের দু’জন সাংবাদিক ও লেখক - সুভাষ সিংহরায় ও তুষার আবদুল্লা ।

\*\*\*\*\*

## রাজ্যপাল :

আগরতলার স্কুল অব সায়েন্স-এর ৩০ বছর পূর্তি উপলক্ষ্যে গতকাল আগরতলা টাউন হল-এ এক অনুষ্ঠানের আয়োজন করা হয়। অনুষ্ঠানের উদ্বোধন করেন রাজ্যপাল তথাগত রায়। উদ্বোধকের ভাষণে রাজ্যপাল শিক্ষা প্রতিষ্ঠানটির প্রশংসা করে বলেন, এই ধরনের শিক্ষা প্রতিষ্ঠান রাজ্যে শিক্ষা প্রসারে গুরুত্বপূর্ণ ভূমিকা পালন করছে। ত্রিপুরায় শিক্ষা হাব গড়ে তোলার সমস্ত সম্ভাবনা রয়েছে বলে তিনি জানান। অনুষ্ঠানে অন্যান্যদের মধ্যে ছিলেন ত্রিপুরা বিশ্ববিদ্যালয়ের প্রাক্তন উপাচার্য অরুনোদয় সাহা, ত্রিপুরা কেন্দ্রীয় বিশ্ববিদ্যালয়ের রেজিস্ট্রার শানিত দেবরায়, সাংবাদিক সুবল কুমার দে, প্রণব সরকার, স্কুল অব সায়েন্স-এর অধ্যক্ষ অভিজিৎ ভট্টাচার্য প্রমুখ।

\*\*\*\*\*

## CPI(M) :

হায়দ্রাবাদে অনুষ্ঠিত CPI(M)-এর ২২ তম পার্টি কংগ্রেস গতকাল শেষ হয়েছে। পার্টির সাধারণ সম্পাদক হিসেবে পুনরায় নির্বাচিত হয়েছেন সীতারাম ইয়েচুরি। হায়দ্রাবাদ থেকে CPM সাংসদ জিতেন্দ্র চৌধুরী জানিয়েছেন, ১৫ জনের কেন্দ্রীয় কমিটিতে ত্রিপুরা থেকে

জিতেন্দ্র চৌধুরী এবং তপন চক্রবর্তী – নতুন অন্তর্ভুক্ত হয়েছেন ।  
কেন্দ্রীয় কমিটি থেকে ত্রিপুরার বাজুবন রিয়াং বাদ পড়েছেন ।

\*\*\*\*\*

**PM :**

প্রধানমন্ত্রী নরেন্দ্র মোদী আগামী ২৭ ও ২৮ শে এপ্রিল চীন সফর করবেন । তিনি সেখানে রাষ্ট্রপতি শি জিং পিং-এর সঙ্গে ঘরোয়া শিখর বৈঠকে মিলিত হবেন । পররাষ্ট্রমন্ত্রী সুষমা স্বরাজ গতকাল চীনের বিদেশমন্ত্রী ওয়াং ই-র সঙ্গে যৌথ সাংবাদিক সম্মেলনে একথা জানান । উহান শহরে অনুষ্ঠেয় এই বৈঠকে দ্বি-পাক্ষিক বিভিন্ন বিষয়ে আলোচনা হবে । শ্রীমতি স্বরাজ আরও জানান, এ বছর নাখুলা পাস দিয়ে কৈলাস-মানস সরোবর-যাত্রা পুনরায় শুরু হবে ।

\*\*\*\*\*

**মন কি বাত :**

প্রধানমন্ত্রী নরেন্দ্র মোদী আগামী ২৯ এপ্রিল আকাশবাণীর “মন কি বাত” অনুষ্ঠানে দেশ-বিদেশের মানুষের সঙ্গে মত বিনিময় করবেন। এটি হবে আকাশবাণী থেকে প্রচারিত মাসিক এই অনুষ্ঠানের ৪৩তম পর্ব। জনগণ তাদের ভাবনা, পরামর্শ

নরেন্দ্র মোদী aap, মাই গভ ওপেন ফোরাম অথবা নি:শুল্ক নাম্বারে হিন্দি বা ইংরেজিতে ম্যাসেজ রেকর্ড করাতে পারবেন।

\*\*\*\*\*

## অধ্যাদেশ :

১২ বছরের কম বয়সী বালিকাদের ধর্ষণে অভিযুক্তদের মৃত্যুদন্ডের সংস্থান সহ ফৌজদারি আইন সংশোধনের জন্য রাষ্ট্রপতি গতকাল অধ্যাদেশ ২০১৮ জারি করেছেন। গত শনিবার কেন্দ্রীয় মন্ত্রিসভায় অনুমোদনের পর সেই অধ্যাদেশটি রাষ্ট্রপতির স্বাক্ষরের জন্য পাঠানো হয়। রাষ্ট্রপতি রামনাথ কোবিন্দ ভারতীয় দন্ডবিধি, ভারতীয় সাক্ষ্য আইন, ফৌজদারি আইন বিধি ও যৌন নিগ্রহ থেকে শিশুদের সুরক্ষা সংক্রান্ত POSCO আইন সংশোধন করা - এই অধ্যাদেশের মঞ্জুরি দেন। আকাশবাণীর সংবাদদাতা জানান, অধ্যাদেশে ১২ বছরের কম বয়সী বালিকাদের ধর্ষণে মৃত্যুদন্ড, ১৬ বছরের কম বয়সী বালিকাদের ধর্ষণের সংশোধিত আইনে ন্যূনতম শাস্তি হিসেবে কারাবাসের মেয়াদ দশ বছর থেকে বাড়িয়ে কুড়ি বছর করা হয়েছে। প্রয়োজনে দোষীদের যাবজ্জীবন কারাদন্ডের সংস্থানও রয়েছে।

\*\*\*\*\*

## বি জে পি:

বি জে পির রাজ্য কমিটির এক বৈঠক গতকাল অনুষ্ঠিত হয়। বৈঠকে পৌরিহিত্য করেন বি জে পির সর্বভারতীয় সাধারণ সম্পাদক রামমাধব।

বৈঠকে উপস্থিত ছিলেন মুখ্যমন্ত্রী তথা প্রদেশ বি জে পি সভাপতি বিপ্লব কুমার দেব, দলের উত্তর-পূর্বাঞ্চল-এর সাধারণ সম্পাদক অজয় জাম্বুয়াল। এছাড়া উপস্থিত ছিলেন দলের মন্ত্রী ও বিধায়করা। বৈঠকে সাংগঠনিক কাজকর্ম নিয়ে আলোচনা হয়। এর আগে দলের কোর্স কমিটির এক বৈঠক অনুষ্ঠিত হয়।

\*\*\*\*\*

## দাবা :

রাজ্যভিত্তিক শিশু দাবা প্রতিযোগিতায় অনূর্ধ্ব ৯ বছরের বিভাগে অর্শিয়া দাস ও অনূর্ধ্ব ১৩ বছরের বিভাগে সোহম নাগ চ্যাম্পিয়ন হয়েছে। আগরতলা লায়ন্স ক্লাবে অনুষ্ঠিত আসরের ৯ বছরের বিভাগে অর্শিয়া ৬ রাউন্ড-এর লড়াইয়ে ৬ পয়েন্ট সংগ্রহ করে। অন্যদিকে, অনূর্ধ্ব ১৩ বছরের বিভাগে সোহম ৫ রাউন্ড-এর শেষে সাড়ে চার পয়েন্ট সংগ্রহ করে

খেতাৰ অৰ্জন কৰে। এদিকে, গতকাল বিকেল থেকে অনূৰ্ধ  
১১ এবং অনূৰ্ধ ১৫ বছরের দুই বিভাগের খেলা শুরু হয়েছে।

\*\*\*\*\*

### আবহাওয়া :

আজ আবহাওয়ার পূৰ্বাভাসে জানানো হয়েছে, আকাশ অংশত মেঘলা  
থাকবে । বজ্র-বিদ্যুত সহ বৃষ্টি হতে পারে । আজ সকাল পর্যন্ত  
বৃষ্টিপাতের পরিমাণ ছিল ৩ মিলিমিটার । আজ সকালে সৰ্বনিম্ন  
তাপমাত্রা ছিল ২৩ ডিগ্রী সেলসিয়াস ।

\*\*\*\*\*

\*\*\*\*\*



































































































